

畿輔通志卷二百十四

列傳二十二

元四

元

順德府

劉秉忠

父潤弟秉恕

馬亨

劉德淵

張文謙

戎益

郭守敬

李思敬

董朴

林起宗

宋明善

常在

周良佐

孔璠

兄章

張毅

韓安世

尹泰

張德昭

韓德恭

柴福

柴眞

柴登

李惟簡

孔天鐸

子福章

福子

張世英

王翺

張佐成

廣平府

竇默

張之翰子野

石高山父呼嚕古

吳元珪父鼎

劉恩

劉賡

郅朗

張璧

何榮祖

元明善

劉全

安祐

王士元

秦起宗

董搏霄弟昂霄

胡潤祖

李仲芳

王世鑑

郭文祚

馬天驥

高謙

趙慶祥子世英

張思敬

趙思源兄思海弟思淵

恩泉

高傳

元

順德府

劉秉忠字仲晦初名侃又名子聰拜官後始更今名

案元史考證云

元史類編秉忠係世祖所賜名又案輟耕錄云世祖嘗以錢幣問秉忠對曰錢用於陽楮用於陰今國家龍興沙漠宜用楮幣子孫世守之若用錢四海且將不靖遂絕不用錢後武宗用之不久輒罷果如所言其先瑞州人曾

大父仕金爲邢州節度副使因家焉庚辰歲穆呼哩取邢州立都元帥府以其父潤爲都統事定改署州錄事厯鉅鹿內邱兩縣提領所至皆有惠愛秉忠生而風骨秀異志氣英爽不羈八歲入學日誦數百言年十三爲質子於帥府十七爲邢臺節度使府令史以養其親居常鬱鬱不樂一日投筆歎曰吾家累世衣冠乃汨沒爲刀筆吏乎丈夫不過於世當隱居以求志耳卽棄去隱武安山天甯禪師遣徒招致爲僧以其能文詞使掌書記後遊雲中留居南堂寺海雲禪師被召

過雲中聞其博學多材藝邀與俱行既入見世祖應對稱旨
屢承顧問秉中於書無所不讀尤邃於易及邵氏經世書至
天文地理律歷三式六壬遁甲之屬無不精通論天下事如
指諸掌世祖大愛之海雲南還秉忠遂留藩邸父喪賜金百
兩爲葬具乃遣使送至邢州服除

案王磐撰神道碑云初丁母憂毀瘠骨立衣一敝裘

三歲不易及父卒身雖從天竺之教而服食
貶損容貌哀戚與循典禮執通喪者無少異復被召奉旨還

和林上書數千百言其畧曰典章禮樂法度三綱五常之教
備於堯舜三王因之五霸敗之漢興以來至於五代一千三
百餘年由此道也漢文景光武唐太宗元宗五君而元宗不
無疵也然治亂之道係乎天而由乎人天生青吉斯皇帝起
一旅降諸國不數年而取天下勤勞憂苦遺大寶於子孫庶
傳萬祀永保無疆之福嘗聞之曰以馬上取天下不可以馬

上治昔武王兄也周公弟也周公思天下善事夜以繼日每得一事坐以待旦以匡周室以保周天下八百餘年周公之力也君上兄也大王弟也思周公之故事而行之在乎今日不可失也君之所任在內莫大乎相相以領百官化萬民在外莫大乎將將以統三軍安四域內外相濟國之急務然天下之大非一人之可及萬事之細非一心之可察當擇開國功臣之子孫分爲京府州郡監守督責舊官以遵王法仍差按察官守治者升否者黜天下不勞力而定也天下戶過百萬自呼圖克諾延斷事之後差徭甚大加以軍馬調發使臣煩擾官吏乞取民不能當是以逃竄宜比舊減半或三分去一就見在之民以定差稅招逃者復業再行定奪官無定次清潔者無以遷汙濫者無以降可比附古例定百官爵祿儀

仗使家足身貴有犯於民設條定罪威福者君之權奉命者
臣之職今百官自行威福進退生殺惟意之從宜從禁治天
下之民未聞教化見在囚人宜從赦免明施教令使之知畏
則犯者自少教令既施罪不至死者皆提察然後決死犯刑
者覆奏然後聽斷不致刑及無辜天子以天下爲家兆民爲
子國不足取於民民不足取於國相須如魚水有國家者置
府庫設倉廩亦爲助民民有身者營產業闢田野亦爲資國
用也今宜核算官民久負若實爲應當差發所借宜依前旨
一本一利官司歸還凡有賠償無名及虛契所負者並免追
取納糧就遠倉有一廢十者宜從近倉以輸爲便當驛路州
城飲食祇待偏重宜計所費以準差發關市津梁正稅十五
分取一宜從舊制禁橫征以利百姓倉庫加耗甚重宜令權

量度均爲一法使錙銖圭撮尺寸皆平以存信去詐珍貝金銀之所出淘沙鍊石實不易爲一旦以纏綿絲縷皮革塗木石妝器仗取一時之華麗廢爲塵而無濟甚可惜也宜從禁治除帝胄功臣大官以下章服有制外無職之人不得僭越今地廣民微賦歛繁重民不聊生何力耕耨宜差勸農官二員率天下百姓務農桑營產業實國之大益古者庠序學校未嘗廢今郡縣雖有學並非官置宜修建三學設教授開選舉取士以經義爲上詞賦論策次之更宜擇開國功臣子孫亦令入學選達才任用之天下莫大於朝省親民莫近於縣宰雖朝省有法縣宰宜擇縣宰正民自安矣關西河南地廣土沃以軍馬之所出入治而未豐宜設官招撫不數年民歸土闢以資軍馬之用實國之大事伊喇中丞

案伊喇中丞錢大昕謂卽耶律

楚材當云中書 拘權鹽鐵諸產商賈酒醋貨殖諸事以定宣
不當云中丞

課已不爲輕鄂囉哈瑪爾奏請於舊額加倍權之往往科取
民間民無所措手足宜從舊例辦權更或減輕無縱獻利之
徒削民害國鰥寡孤獨廢疾者宜設孤老院給衣糧以爲養
使臣到州郡宜設館不得於官衙民家安下孔子爲百王師
立萬世法今廟堂雖廢存者尙多宜令州郡祭祀釋奠如舊
儀近代禮樂器具縻散宜令置辦徵太常舊人教引後學使
器備人存漸以修之實太平之基王化之本今天下廣遠雖
青吉斯皇帝威福之致亦天地神明所祐也宜訪明儒循舊
禮奠祭上下神祇和天地之氣順時序之行使神享民依德
極於幽明天下賴一人之慶見行遼歷日月交食頗差開司
天臺改成新厯未見施行宜因新君卽位頒厯改元令京府

州郡置吏更漏使民知時國滅史存古之常道宜撰修金史令
一代君臣事迹不墜於後世國家廣大如天萬中取一以養
天下名士宿儒之無營運產業者使不致困窮或有營運產
業者止輸差稅其餘大小雜泛並行蠲免使自給養實國家
養才勵人之大也明君用人如大匠用材隨其巨細長短以
施規矩繩墨孔子曰君子不可小知而可大受小人不可大
受而可小知蓋君子所存者大不能盡小人之事或有一短
小人所拘者狹不能同君子之量或有一長盡其才而用之
成功之道也君子不以言舉人不以人廢言大開言路所以
成天下安兆民也天地之大日月之明而或有所蔽且蔽天
之明者雲霧也蔽人之明者私欲佞說也常人有之蔽一心
人君有之蔽天下宜選左右諫臣使諷諭於未形忖度於至

密君子之心一於理義小人之心一於利欲君子得位能容
小人小人得勢必排君子明君在上不可不辨也今言利者
衆非圖以利國害民實欲殘民而自利也宜將國中人民必
用場冶付各路課稅所以定權辦其餘言利者竝行罷去古
者治世均民產業今窮乏者益損富盛者增加宜禁行利之
人勿恃官勢居官在位者勿侵民利商賈與民和好交易不
生擅奪欺罔之害眞國家之利也笞箠之制宜會古酌今均
爲一法使無敢過越禁私置牢獄及鞭背之刑以彰愛生之
德立朝省以統百官分有司以御衆事以至京府州縣親民
之職無不備紀綱正於上法度行於下故天下不勞而治也
今新君卽位之後可立朝省以爲政本其餘百官不在員多
惟在得人焉耳書上世祖嘉納焉又言邢州舊萬餘戶兵興

以來不滿數百彫壞日甚得良牧守如正定張耕洺水劉肅者治之猶可完復朝廷卽以耕爲邢州安撫使肅爲副使由是流民復業升邢爲順德府癸丑從世祖征大理明年征雲南每贊以天地之好生王者之神武不殺故克城之日未嘗妄戮一人

元史

已未從伐宋由陽羅渡濟漢江秉忠曰古者軍

賞不踰時蓋急武功作士氣也今三軍暴露於外久宜少酬其勞帝卽命呼嚕蘇諭其志故人人踴躍皆樂爲用進圍鄂州閏三月宋人乞和全師而還

名臣事略

中統元年世祖卽位問

以治天下之大經養民之良法秉忠宋祖宗舊典參以古制之宜於今者條例以聞於是下詔建元紀歲立中書省宣撫司朝廷舊臣山林遺逸之士咸見錄用文物粲然一新秉忠雖居左右而猶不改舊服時人稱爲聰書記至元元年翰林

學士承旨王鶚奏言秉忠久侍藩邸積有歲年參帷幄之密謀定社稷之大計忠勤茂著宜被褒崇聖明御極萬物維新而秉忠猶仍其野服散號深所未安宜正其衣冠以顯秩帝覽奏卽日拜光祿大夫位太保參預中書省事詔以翰林侍讀學士竇默女妻之賜第奉先坊且以少府宮籍監戶給之秉忠旣受命以天下爲已任事無巨細凡有關於國家大體者知無不言燕閒顧問輒推薦人物凡所甄拔後悉爲名臣初帝命秉忠相地於桓州東灤水北建城郭於龍岡三年而畢名曰開平繼升爲上都而以燕爲中都四年又命秉忠築中都城始建宗廟宮室八年奏建國號曰大元而以中都爲大都他如頒章服舉朝儀給俸祿定官制皆自秉忠發之爲

一代成憲

案續文獻通考云徐世隆祭文云扈從王師柔服哀牢公於是時蜀之韋皋堂上出奇鄂江飛渡公

於是時晉之杜預是秉忠尚有戰功也傳略不載十一年扈從至上都其地有南屏

山嘗築精舍居之秋八月無疾端坐而卒年五十九帝驚悼

謂羣臣曰秉忠事朕三十餘年小心慎密不避艱險言無隱

情其陰陽術數之精占事知來若合符契惟朕知之他人莫

得聞也出內府錢具棺歛遣禮部侍郎趙秉溫護其喪還葬

大都十二年贈太傅封趙國公諡文貞成宗時贈太師諡文

正仁宗時又進封常山王秉忠自幼好學至老不衰雖位極

人臣而齋居蔬食終日澹然不異平昔元史書得魯公筆法行

草獨師二王元詩選其詩蕭散閑淡類其爲人自號藏春散人

有文集十卷無子以弟秉恕子蘭璋後秉恕字長卿好讀書

年弱冠受易於劉肅遂明理學兄秉忠事世祖以薦士自在

嫌於私親獨不及秉恕左右以聞召見遂同侍潛邸世祖嘗

賜秉忠白金千兩辭曰臣山野鄙人僥倖遭際服器悉出尙
方金無所用世祖曰卿獨無親故遺之邪辭不允乃受而散
之以二百兩與秉恕秉恕曰兄勤勞有年宜蒙茲賞秉恕無
功可冒恩乎終不受中統元年擢禮部侍郎邢州安撫副使
二年賜金符遷吏部侍郎三年升邢爲順德府賜金虎符爲
順德安撫使至元元年轉官法行改嘉議大夫厯彰德懷孟
淄萊順天太原五路總管淄萊府有死囚六人獄已具秉恕
疑之詳讞得實六人賴以不死他所至皆有惠政召除禮部
尙書出爲淮西宣慰使會省宣慰司厯湖州平陽兩路總管
平陽歲荒民艱食輒開倉振之全活者衆年六十卒於官
馬亨字大用邢州南和人少孤事母孝金季習爲吏庚寅太
宗始建十路徵收課稅使河北東西路使王晉辟亨爲掾以

才幹稱甲午晉薦於中書令耶律楚材授轉運司知事尋升
經歷擢轉運司副使庚戌太保劉秉忠薦亨於世祖召見潛
邸甚器之旣而籍諸路戶口以亨副巴宗孟克撫諭西京太
原平陽及陝西五路俾民弗擾旣還圖山川形勢以獻餘使
者多以賄敗惟亨等各賜衣九襲癸丑從世祖征雲南留亨
爲京兆權課所長官以寬簡治之不事掊克凡五年民安而
課裕丁巳憲宗遣阿勒達爾等覈藩府錢穀亨時輦歲課銀
五百錠藩府道出平陽適與之遇亨策曰見之則銀必拘留
不見則必以罪加我與其銀弗達王府甯獲罪焉避而過之
阿勒達爾果怒遣使逮之世祖詢亨曰汝往得無撫汝罪邪
對曰無害願一行旣至拘係之窮治百端竟無所得惟以支
竹課分例錢充公用及餽公廨輦運腳價爲不應勒償其直

而己世祖知其誣更賜銀三十二錠己未從世祖攻鄂州北
還遣亨馳驛往西京等處罷所僉軍并撫諭山西河東陝右
漢中旣還復遣轉餉江上軍實中統元年世祖卽位陝西四
川立宣撫司詔亨議陝西宣撫司事尋賜金符遷陝西四川
規措軍儲轉運使時阿勒達爾等叛亨與宣撫使廉希憲商
挺合謀誅劉太平等悉定關輔尋建行省命亨兼陝西行省
左右司郎中時興元畜糧五萬石欲轉餉太安軍計傭直萬
緡衆推亨往時丁內艱以攝省府事強起之至則以兵官丁
產均其役不閱月而事集無勞民傷財之弊興元判官費正
寅狡悍不法亨白省府欲以法繩之反誣搆行省前保關中
有異謀詔右丞鈕祜祿珪讞之亨力辯之冤遂釋四年遷陝
西五路西蜀四川廉訪都轉運使未幾朝廷以考課檄諸路

轉運使至則併轉運司入總管府咸奪其制書授亨工部侍郎解鹽副使亨乃上言以考課定賞罰其人甫集而一改罷之則是非安在宜還其命書俾仕者有所勸勉從之亨復上便宜六事一曰東宮保傅當用正人以固國本二曰中書士政擇任儒臣以立朝綱三曰任相惟賢官不必備今宰相至十七員宜加裁汰四曰左右郎署毗贊大政今用豪貴子弟豈能贊襄五曰六曹之職分理萬機今止設左右二部事何由辦六曰建元以來便民條畫已多有司往往視爲文具宜令憲司糾舉務在必行疏聞帝卽召見面獎之至元三年進嘉議大夫左三部尙書尋改戶部尙書金穀出納有條不紊時有賈胡恃制國用使阿哈瑪特欲貿交鈔本私平準之利以增歲課爲詞帝以問亨對曰交鈔可以權萬貨者法使然